
ՏՈՄԱՐԱԿԱՆ ԵՎ ԱՍՏՂԱԲԱՇԽԱԿԱՆ ՊԱՏԿԵՐԱՑՈՒՄՆԵՐԸ ՀԱՅ
ԺՈՂՈՎՐԴԱԿԱՆ ՀԵՔԻԱԹՆԵՐՈՒՄ

ԹԱՄԱՐ ՀԱՅՐԱՊԵՏՅԱՆ

Հայ ժողովրդի տոմարական ու աստղաբաշխական գիտելիքները, ունենալով պատկառելի հնություն, իրենց արտահայտությունն են գտել թե՛ հայկական դիցաբանական պատկերացումներում և թե՛ բանահյուսական կենցաղում՝ մասնավորապես հրաշապատում հեքիաթներում: «Օգ-Մանուկին հաքյաթը», «Որսորդ Հայրապետ», «Արտուճ և խաղաղ թագավոր», «Չոփչի», «Օձվենի ծառ» և մի շարք հեքիաթներում տեղ գտած աստղալից երկնքի օրական պտույտի, կենդանաշրջանի 12 համաստեղությունների ու մարդու մարմնի համապատասխան մասերի, Կենաց ծառի ու աշխարհի հավերժությունը խորհրդանշող չորս տարրերի (օդ, ջուր, հող, կրակ) փոխառնչությունների վերաբերյալ մոտիվները համապատասխանում են նաև միջնադարյան ձեռագրերի՝ աստղաբաշխական հաշիվների վրա հիմնված հմայական - գուշակողական տվյալներին՝:

Երկնալորտում աստղերի բաժանումն ըստ համաստեղությունների կատարվել է շատ հին դարերում¹, քանի որ դրանցով է անցնում Արեգակի տեսանելի ուղին: VII դարի հեղինակ Անանիա Շիրակացու հիմնավորմամբ՝ համաստեղություններով են անցնում Արեգակի, Լուսնի ու մոլորակների ճանապարհները, դրանցով են պայմանավորվում գիշերվա ու ցերեկվա տևողությունները, տարվա եղանակները³:

Բանահյուսական կենցաղում ժամանակը ալեհեր ծերունու կերպարանքով իշխում է ցերեկվա լույսի և գիշերվա խավարի կանոնավոր ընթացքի վրա, ինչն իր արտահայտությունն է գտել Ա. Աարնեի և Ս. Թոմփսոնի հեքիաթային տիպերի միջազգային համացույցի⁴ 304 թվահամարին համապատասխանող հայկական «Պստիկ Միրզան և դև

¹ Այս առումով ուշագրավ նմուշներ կարող են հանդիսանալ հայկական միջնադարյան ձեռագրերի մանրանկարչական որոշ խորաններ [Մ. Մաշտոցի անվան Մատենադարան (այսուհետև՝ ՄՄ), ձեռ. № 7736, 9422, թ. 12ա, 13բ, 14ա, 21ա և այլն]:

² Բավական ուշ շրջանում են համաստեղությունների հունական, այժմ հայտնի անուններն ու պատկերները տարածվել մյուս ժողովուրդների մեջ: Առանձնահատուկ ուշադրության է արժանի այն փաստը, որ մոլորակների հայկական անվանումները (Փայլածու, Լուսաստղ կամ Լուսաբեր, Հրատ, Լուսնթագ, Երևակ) գրեթե ճշգրտորեն համընկնում են դրանց հին հունական իմաստային անվանումների հետ, որոնք Հունաստանում գործածվել են մինչև մ. թ. ա. VI–IV դդ. (տե՛ս Բ. Ե. Թոմփսոնի և Ն. Մ. Մաշտոցի պատմությունից, Երևան, 1985, էջ 202–205, Հայկական սովետական հանրագիտարան, Սովետական Հայաստան (լրացուցիչ), Երևան, 1987, էջ 379–380):

³ Ա ն ա ն ի ա Շ ի ր ա կ ա ց ի. Տիեզերագիտություն և տոմար, աշխատ. Ա. Արրահամյանի, տե՛ս «Յաղագս Հիւսիսային աստեղացր» բաժինը, Երևան, 1940, էջ 38–39:

⁴ A. Aarne – S. Thompson. The Types of the Folktale A Classification and Bibliography. Antti Aarne's Verzeichnis der Märchentypen. Translated and Enlarged by Stith Thompson, Second Revision, Helsinki, 1964.

Գորգոչան», «Կրակոտ Ոսպ», «Զվալ աստղ և Նոանհատ ու Օսկեծամ» հեքիաթներում⁵: Այսպես, «Պատիկ Միրզան և ղև Գորգոչան» հեքիաթում «հալնոր նստեր դարի գլուխ, սև թելե կծիկ մը ձեռք, կը կծկե, սպիտակ թելե ջոջ կծիկ մ'էլ դրեր կուշտ: Կերթա մոտ կը հարցուցե:– Էդ ինչ կծիկներ են. դու ո՞վ ես:

– Որդի, – կասե, – ես Ժուկն ու Ժամանակն եմ, սև կը կծկեմ գիշեր է, սպիտակ կծկեմ ցերեկ»⁶: «Կրակոտ Ոսպ» (Չարսանճագ), «Զվալ աստղ և Նոանհատ ու Օսկեծամ» (Բաղեշ) հեքիաթներում հերոսների հարցին՝ թե ի՞նչ է կծկում, «ըխտիար բարան» պատասխանում է նույն կերպ. «Լուսն ու մութ ա, կու կծկեմ»⁷ կամ «Գիշերը գիշեր կինիմ, ցորեկը ցորեկ, կծիկը կը թոփիմ լոսնայ»⁸:

Հայաստանում օրվա ժամի որոշումը աստղագիտության տարածված կիրառություններից է եղել⁹: Հայերը օրը բաժանել են 12 ցերեկային և 12 գիշերային ժամերի: Դրանք ունեցել են իրենց հատուկ անունները՝ պայմանավորված այդ պահի լուսավորվածության աստիճանով:

Վերոհիշյալ հեքիաթների ծերունին ոչ մի կերպ չի հանդուրժում իրեն ուղղված թախանձանքը՝ «Մե քիչ հո՛ւշիկ կծկա, էրթամ էս տեղ, չուրի կրակ առնիմ իզամ»¹⁰, քանի որ չի կարելի խախտել աշխարհի տարածաժամանակային ամբողջությունը. «Չըլլիր, այ որդի, հայվնները, թռչունները, մարդիկ խորթլանմիշ կըլլին, տի կծկիմ»¹¹:

Գիշերվա և ցերեկվա, ինչպես նաև նախնական պատկերացումներով պայմանավորված երկու հիմնական եղանակների (գարնանա - ամառային և աշնանա - ձմեռային) հարաբերակցությունն իբրև վերածնունդ և մահ դիցաբանման է ենթարկվել թե՛ հայկական միջնադարյան ձեռագրերում¹² և թե՛ հրաշապատում հեքիաթներում. «Որսորդ Հայրապետ»¹³ (Չարսանճագ) հեքիաթում Մասիսի պես մի բարձր լեռան ստորոտում մի ծերունի «պոռուն դրեր է բերնին, կը փչե, հա կը փչե. երկինք՝ գետին էրոր փչելուն կը թողան. աշխարք բուք ու քամի դառուցեր է»¹⁴: Որսորդ Հայրապետը գավազանով հարվածում է ծերունուն. «Էաս ծերունին պոռուն գգելուն պես, աշխարք էղավ արև, տաք, քամին կըլլավ. հավան աղկեկ»¹⁵: Նույն Չարսանճագի բարբառով գրանված

⁵ Գ. Մ ր վ ա ն ձ տ յ ա ն ց. Երկեր, հ. 1, Երևան, 1978, էջ 434–444, Էմինյան ազգագրական ժողովածու (այսուհետև՝ ԷԱԺ), հ. Բ, Մոսկվա - Վաղարշապատ, 1901, էջ 257–267, Հայ ժողովրդական հեքիաթներ (այսուհետև՝ ՀԺՀ), հ. IX, Երևան, 1968, էջ 361–375:

⁶ Գ. Մ ր վ ա ն ձ տ յ ա ն ց. նշվ. աշխ., էջ 437:

⁷ ՀԺՀ, հ. IX, էջ 366:

⁸ ԷԱԺ, հ. Բ, էջ 219:

⁹ ՄՄ, ձեռ. № 1971, թ. 109բ – 110ա, ձեռ. -1972, թ. 65, ձեռ. -6895, թ. 2: Հին և միջնադարյան Հայաստանում օրվա սկիզբը համարվել է առավոտյան արևածագը: Սկսած 1925 թ. հունվարի 1-ից թե՛ աստղագիտության մեջ և թե՛ քաղաքացիական կյանքում օրվա սկիզբը համարվում է կես գիշերը (Բ. Ե. Թ ու մ ա ն յ ա ն. նշվ. աշխ., էջ 92–93, 146):

¹⁰ ԷԱԺ, հ. Բ, էջ 219:

¹¹ Նույն տեղում:

¹² ՄՄ, ձեռ. № 8973, թ. 11բ:

¹³ ԷԱԺ, հ. Բ, էջ 257–267:

¹⁴ Նույն տեղում, էջ 263:

¹⁵ Նույն տեղում:

«Գորտ»¹⁶ հեքիաթում հերոսը «գիշեր - ցորեկ կերթա ու կերթա», «գնրց մտավ մուր զ-խարքը», ուր «վեց ամիս պիր տյուզիյե (միաժամանակ) գիշեր է, վեց ամիս պիր տյուզիյե ցորեկ»¹⁷: Հայտնի է, որ «Երկիրը մեկ հյուսիսային կիսագնդով է թեքված լինում դեպի Արեգակը, մեկ (վեց ամիս հետո) հարավային կիսագնդով: Այստեղից էլ փոփոխվում են գիշերվա և ցերեկվա տևողությունները, ինչպես նաև առաջանում են տարվա եղանակները»¹⁸: «Գորտ» հեքիաթի տղան անհանգիստ էր. «Էաս գիշեր ի նչ շատ էրկեան եղավ, կրսեր, չէր գիտեր օ վեց ամիս գիշեր է»¹⁹: «Ընդ որում, եթե հարավային կիսագնդում լինում է ամառ, ապա հյուսիսայինում լինում է ձմեռ և հակառակը»²⁰: Տղայի հարցին, թե ինչու իր տան դռները հակառակ են բացված («մեկը մեկ թարաֆ էս բացեր, մեկը մեկ թարաֆ») ի պատասխան՝ հեքիաթի հալիվորը մեկնաբանում է տարվա տաք ու սառը եղանակների փոխհաջորդականությամբ. «Ըսի ամրան տեղ է, ամառը հոս կը պարկիմ, սերին է: Չմեռն էալ հոս կը պարկիմ»²¹:

Հայ ժողովրդական հեքիաթներում առկա են մի շարք աստղաբաշխական տեղեկություններ, որոնք համախոս են հնագիտական պեղումների արդյունքներին²² և որոնց տրված է որոշակի կողմնորոշում՝ դեպի հարավ²³: Մակայն, ինչպես իր ժամանակին բոլոր հին ժողովուրդները, այնպես էլ մեր նախնիները դեռևս ճշգրիտ պատկերացում չունեին, թե լուսատուները մայր մտնելուց հետո որտեղ են «թաքնվում». ենթադրվում էր, որ մտնում են սարերի ետևը կամ ընկղմվում ջրերի մեջ²⁴: Արևի երթուղու այս ըմբռնումն առկա է «Օձեմանուկ, Արևմանուկ»²⁵, «Արևի հեքիաթը»²⁶, «Օգ-Մանուկին հարյաթը»²⁷, «Արտուճ և խաղաղ թագավոր»²⁸ ու այլ հրաշապատում դիպաշարերում.

« - Բնչպե՞ս կը խաղա արևը մեարը մտած ժամանակ, էրկու սահաթեն ետև արևը ո՞ր կերթա:

¹⁶ ԷԱԺ, հ. Բ, էջ 198–216:

¹⁷ Նույն տեղում, էջ 205:

¹⁸ Բ. Ե. Թ ու մ ա ն յ ա ն. Երկրակենտրոն և արևակենտրոն համակարգերը Հայաստանում, Երևան, 1973, էջ 34–35:

¹⁹ ԷԱԺ, հ. Բ, էջ 205:

²⁰ Բ. Ե. Թ ու մ ա ն յ ա ն. Երկրակենտրոն և արևակենտրոն համակարգերը Հայաստանում, էջ 35:

²¹ ԷԱԺ, հ. Բ, էջ 198–199:

²² Է. Խ ա ն գ ա ղ յ ա ն, Կ. Մ կ ր տ չ յ ա ն, Է. Պ ա ր ս ա մ յ ա ն. Մեծամոր. ուսումնասիրություն, 1965–1966 թթ. պեղումների տվյալներով, Երևան, 1973, էջ 142–165:

²³ Б. Т у м а н я н. Древнейшие наскальные астрономические рисунки, обнаруженные в Армении. – Труды XIII Международного конгресса по истории науки. М., 1971, с. 12–13.

²⁴ Մ. Ա ր է ղ յ ա ն. Երկեր. հ. Է, Երևան, 1975, էջ 41: Ուշադրության է արժանի հայ մատենագրության մեջ հակագիտական այդ տեսակետի քննադատությունը. «Եւ գայս տեսանելով բազումք յանուսումնութենէ՝ արեգական կորուստ կարծեն» (Անանիա Շիրակացի. նշվ. աշխ., էջ 59), «Եվ գայն ոչ գիտեն՝ թե վասնզի ցամաք ուրեք ՚ի ծովէ անտի ոչ էրեւի, յայն սակս թուի՝ թէ [արև – Թ. Ն.] ՚ի ծովէ անտի էլանիցէ» (Եզնիկայ Կողբացոյ Բագրևանդայ եպիսկոպոսի Եղծ աղանդոց, ՚ի Վենետիկ, ՚ի սուրբն Ղազար, 1826, ԲԵ, էջ 190):

²⁵ Գ. Ս ր վ ա ն ձ ա տ յ ա ն ց. նշվ. աշխ., էջ 494:

²⁶ Հայաստանի պատմության թանգարան (այսուհետև՝ ՀՊԹ), Ե. Լալայանի ֆ. 53/46, էջ 467:

²⁷ ՀԺՀ, հ. VI, Երևան, 1973, էջ 77–80:

²⁸ ԷԱԺ, հ. Բ, էջ 233–240:

– Արևը կը մննա դաֆեսը (վանդակ), դաֆեսին տյուման (դեկ) կա, կօլրվի, տյումանն էալ հեսը կօլրվի:

Աղջիկը ըսըց.– Չիմ հավատար:

– Իրիկուն քիզի կը սալիցնեմ (լուր կտամ), ըսըց տղան²⁹:

Վերոհիշյալ «Արտուճ և խաղաղ թագավոր» հեքիաթի հերոսը ցուցում է նաև երկնքի այն տեղը (Միր կաթին), որը համաշխարհային ջրհեղեղի առասպելի համաձայն պատմվել է ժամանակին և ջրհեղեղի ջրերը տեղացել են երկրի վրա³⁰. «Երկինքը պանած տեղը հայեալ, քարսուն օր քարսուն գիշեր արզն կուգար:

– Ըդ կարը տեսա ը,– ըսըց տղան, ըս կարը կօլրվի կուգա... (լեռան անոն) վրան, կլոսնայ³¹:

Հայկական հրաշապատում հեքիաթներում Արևի ծագման տեղի մասին մոտիվները համապատասխանում են Աարնե - Թոմփսոն համացույցի «Ժողովրդական հեքիաթների տիպերի» AT 461 A թվահամարին³²: Չոփչին խարդախ «բեզրգյանի» հետ գրագ է գալիս Արևի՝ արևմուտքից ծագելու հնարավորության վերաբերյալ: Հեքիաթի հերոսները երկուստեք համոզված են գրագի անհեթեթության մեջ, հետևաբար, չոփչին հաղթող է դուրս գալիս ոչ թե տիեզերական կարգուկանոնի խախտման ու արևի շրջապատույտի կամայական փոփոխության, այլ առասպելական ժամանակը մարմնավորող հալիվորի կամ Աստծո՞ւ³³ օգնությամբ. «Որ կգա մարջ գալու, դու կասես՝ արևը ո՞րդիան ա դուս գալի, նա կասի՝ արևեքիցը, դու ասա՝ արևմտիցը, վախենաս ո՞չ:– Ասեց հալիվորը ու համփարցվեց³⁴ «(«Չոփչի» - Այրարատ): Այրարատից գրառված մեկ այլ նույնանուն հեքիաթում³⁵ չոփչուն սատարում է Աստված. «Որ մարջ էկար, էն վախտը ես արևը քու ասած դիհիցը կհանեմ: Մարջը կտանես, մալ ու դովլաթդ էլ եդ կգա քու ձեռը»³⁶:

Արձեշի բարբառով գրառված «Անձը պողպատ» (Ճան Փօլատ)³⁷ հեքիաթում առկա են ձիերի միջոցով արևակառքի տեղափոխման մասին պատկերացումների վերապրուկներ: Հրեղեն ձին թագավորի փոքր որդուն սաստում է, որ Արևին մոտենալիս թաքնվի իր փորի տակ. «Խողածին, ինչի ձի կը խեծնիս. ես կելնիմ վի, կուտամ քե հառջն արեգական. կը վառիմ: Ինչ էն գախ կը բարձրնա արևի մոտ, դու սրջվի ձիու փորի տակ»³⁸:

²⁹ Նույն տեղում, էջ 240:

³⁰ Ա. Ղ ա ն ա լ ա ն յ ա ն. Ավանդապատում. Երևան, 1969, № 4, է (էջ 8):

³¹ ԷԱԺ, հ. Բ, էջ 240:

³² A. A a r n e, S. T h o m p s o n. Նշվ. աշխ.:

³³ Այս հանգամանքը համախոս է լուսատուների՝ աստվածային կամքով շարժվելու վաղ միջնադարյան քրիստոնեական ըմբռումներին (տե՛ս Ս. Հարությունյան. Հայ առասպելաբանություն, Բեյրութ, 2000, էջ 50): Նույն պատկերացումն է ընկած նաև «Անգետ աստղաբաշխ» Մուշ-Բուլանքի հեքիաթի հիմքում (ՀՏՀ, հ. X, Երևան, 1967, էջ 262.):

³⁴ ՀՏՀ, հ. I, Երևան, 1959, էջ 555:

³⁵ ՀՏՀ, հ. II, Երևան, 1959, էջ 161–173:

³⁶ Նույն տեղում, էջ 170:

³⁷ ԷԱԺ, հ. Բ, էջ 318 - 320:

³⁸ Նույն տեղում, էջ 320: Հայաստանի պատմության թանգարանում պահպանվող մեր թվականությունից ավելի քան հազար տարի առաջ գոյություն ունեցած գոտի - օրացույցի (հայտնաբերված 1946 թ. Սանահին գյուղում՝ քարարկղային տիպի կամարածածկ դամբարանից)

Հայկական հրաշապատում հեքիաթներում Արևը բոցեղեն, ոսկեհեր պատանի է, որին անհնար է մոտենալ առանց մոխրանալու. «Ախճի, հոր ըս եկալ, արեգակը էս սհաթ վրեր կրկյա, քյեզ խանձող շինի»³⁹, «Դու տղիս չես կարա խոսի, նա քեզ կվառի»⁴⁰ կամ «Հիմա որդիս կուգա չըլլի թե էրվիս»⁴¹ (Արևի էներգիայի մասին առասպելաբանական պատկերացումները հմմտ. արդի աստղագիտական տվյալների հետ):

Հայոց մեջ գերագույն դուրսագնի՝ Հայկի անունով է կոչվել Հրատ (լատ. Մարս, հուն. Արես) մոլորակը, ինչպես նաև Արեգակի ամենապայծառ աստղատունը՝ Օրիոն համաստեղությունը⁴²: Հայեր համարվում է առաջին տոմարադիրը՝ «արեգակնային ամիսների բաժանմամբ, շարժական ու անշարժ տարիների միաբանությամբ, ինչը օտարների մեջ կոչվում է Շնիկի, իսկ մեզանում՝ Շրջան Հայկին»⁴³: Մատենագրական ամենավաղ վկայությամբ հայոց աստվածացած նախնիներից ևս մեկի՝ Վահագնի անվան հետ է կապված «Ծիր կաթին» կամ «Հարդագողի ճանապարհ» կոչված աստղաբույլը⁴⁴, ինչը գիտական շրջանակներում իբրև կենաց ծառ համարվում է հրաշապատում հեքիաթների ոսկեպտուղ - խնձորենուն⁴⁵:

Հայոց տոմարական հաշիվներում կենդանակերպերից ու բնության ստեղծագործ չորս ուժերից բացի հատուկ տեղ է գրավում նաև Կենաց ծառը (Տիեզերական ծառի մի տարբերակը)՝ իբրև տիեզերքն ու ժամանակը բովանդակավորող ամբողջություն. «Հագարան բլբուլ կամ Ալո - Դինոյի նաղը»⁴⁶ (Այրարատ) հեքիաթում աղքատ հալիվորը խնձոր է խնդրում թագավորի այգեպանից և մերժվելով՝ անիծում է այգին: «Ընչար Հագարան բլբուլը բերեք ո՛չ», այգին ու խնձորենին չի կանաչի, - ասում է հալիվորը: Իսկ բլբուլը բերելը «շատ դժար է», այն գտնվում է «Չաչոնց թագավորի պալատի ծովի դիհում»: Որպեսզի տղան բարձրանա և հասնի բլբուլին, պետք է կարողանա հնազանդեցնել ծովեղեն ձիուն (ջրի տարերքը) և ամբողջ ուժով մտրակի նրան. «Կարա՞ս ինձ մի ընենց դաւշի տաս, որ իրենք հարիիր վաթսունըվեց տամարս դողա, էս բանցրանամ ընչար փանջարեն, ձեռք քցես՝ միհետից դաֆազը վեր ունես, թե վե չրկալար, էրկուսս էլ

փորագրումներից մեկի վրա Արեգակը բարձրացել է ձիու գավակից էլ վեր, երկրորդում ընկել է ներքև՝ ձիու կրծքի դիմաց, իսկ երրորդում նորից գտնվում է ձիու մեջքին (Բ. Թ ու մ ա ն յ ա ն, Հ. Մ ն ա ց ա կ ա ն յ ա ն. Բրնոզե դարի գոտի օրացույց, Երևան, 1965, էջ 29): Ըստ հին հույն պատմագիրներ Քսենոփոնի և Ստրաբոնի վկայությունների՝ հայերը ձի էին նվիրում կամ զոհաբերում Արևին կամ Արևի աստծուն (Ք ու ե ն փ ո ն. Անաբասիս. թարգմ. Ս. Կրկյաշարյանի, Երևան, 1970, էջ 98, С т р а б о н. География в 17 книгах. М., 1964, XI, 14, с. 9).

³⁹ ՀԺՀ, հ. VI, էջ 80:

⁴⁰ ՀՊԹ, Ե. Լալայանի ֆ., 53/46, էջ 467:

⁴¹ Գ. Մ ր վ ա ն ձ ա յ ա ն ց. նշվ. աշխ., էջ 494: Ջերմաստիճանը Արեգակի մակերևույթի վրա հասնում է 6000°-ի, ինչից մարդն ակնթարթորեն կվերածվի գոլորշու (Բ. Թ ու մ ա ն յ ա ն. Ծիր կաթին, Երևան, 1952, էջ 11):

⁴² Ղ. Ա լ ի շ ա ն. Հին հուսար կամ հեթանոսական կրոնք հայոց, Վենետիկ, 1895, էջ 119:

⁴³ Նույն տեղում, էջ 125:

⁴⁴ Ա ն ա ն ի ա Շ ի ր ա կ ա ց ի. նշվ. աշխ., էջ 37:

⁴⁵ Ծ. Ե ր Ե ն. Лунный бог. М., 1976, с. 118-120. "Это дерево мы называем Млечным Путем" (նույն տեղում, էջ 118):

⁴⁶ ՀԺՀ, հ. I, էջ 27 - 48:

վե կրնկենք, կմահանանք»⁴⁷: Մարդու մարմնի մասերի և տարվա բաղադրիչների համապատասխանությունը, ինչը բնորոշ է Կենաց ծառին, վերոհիշյալ հեքիաթում արտահայտվում է ձիու մարմնի մկանների և տարվա օրերի թվի համախոսությամբ: Մա վկայում է հեքիաթում առկա տոմարական հաշիվների հնավանդության մասին, չէ՞ որ ի սկզբանե համաստեղություններն ու մոլորակները պատկերվում էին ոչ թե մարդակերպ, այլ կենդանակերպ (Կենաց ծառի գագաթին թառած թռչունը հմմտ. չորացած խնձորենին հազարան բլբուլի միջոցով կանաչեցնելու և Տիեզերքի կարգուկանոնը վերականգնելու պատկերացումների հետ): «Ա՛ կնիկ, վեր կաց, էթանք մեր հայրենիքը: Մեր թագավորությունը խանգարված ա, սաբար էս դուշը»⁴⁸:

«Քաչիկի հեքիաթում»⁴⁹ (Մուշ - Բուլանըխ) քամեղեն ձին (օղի տարերք) հեծած հերոսը քնում է ծառի տակ, որի վրա բուն կա, բնի մեջ՝ «չորս հատ հավքու ձագ»: Հերոսն արթնանում է ձագերի աղեկտուր ծվծվոցից և սպանում ծառն ի վեր մագլցող վիշապօձին: Մայր հավքն ի նշան երախտագիտության՝ տղային խոստովանում է, որ ինքը Մինամ հավքն է. «Իդա դիմացի բանձր սար կը տեսնա՛ս, էդ լե Մինամա սարն է. էդ սարի վրեն մեկ թաք ծառ կա, էդ ծառի վրեն տարին յոթ խնձոր կը հասնի, ըշտե Անմահական խնձոր օր կըսին՝ էդ է: Մարդ չը կոնա հելնա էդ սար, հողածնի հոտք չը կոխերե զընդրա հող...»⁵⁰:

Առասպելաբանական պատկերացումների համաձայն՝ սարը իրար է կապում Երկինքն ու Երկիրը, բարձր ծառը խորհրդանշում է տարին (12 ամիս), չորս ձագը՝ բնության չորս տարերքը կամ տարվա չորս եղանակները, յոթ խնձորները՝ երկնքի յոթ շերտերը կամ շաբաթվա օրերը, վիշապը՝ մահը: Կենաց ծառի այս ինվարիանտային (անփոփոխ) մոտիվների և տիեզերքի տարածաժամանակային միավորների հարաբերությունը «իրագործվում է ծառի վրա գտնվող թռչունի կամ կենդանու զոհաբերությամբ կամ նրա որևէ մասի (կաթի) օգտագործումով (դարձյալ զոհաբերության գաղափար)»⁵¹. «Իդա իմ չորս ձգերուց լե մեկ քրզի փեշքեշ, տար մորթե, զմաշկն էրե տիկ, բի՛, օր զիմ կաթ կթիմ մեջ, առնիս տանիս: Լե հմալ տեղ մե տանիս մորթիս, օր ուր ձեն չընկնա իմ ականջ, թե չէ՛ զքրզի կը ձվըռնիմ, կենիմ կտոր - կտոր»⁵²: «Արտուճ և խաղաղ թագավոր» հեքիաթում Կենաց ծառի և տարվա ժամանակային բաղադրիչների հարաբերությունը խմբագրվել է քրիստոնեական գաղափարախոսությամբ: Հեքիաթի տղան տարվա 12 ամիսները համեմատում է Քրիստոսի աշակերտների, ավելի վաղ ժամանակներում ընդունված տարվա 3 եղանակները՝ Քրիստոսի և սուրբ Երրորդության հետ⁵³:

⁴⁷ Նույն տեղում, էջ 36:

⁴⁸ Նույն տեղում:

⁴⁹ ՀԺՀ, հ. X, էջ 107 - 116:

⁵⁰ Նույն տեղում, էջ 113:

⁵¹ Մ. Հ ա ր և թ յ ո ն ի ն յ ա ն. նշվ. աշխ., էջ 23:

⁵² ՀԺՀ, հ. X, էջ 113:

⁵³ ԷԱԾ, հ. Բ, էջ 238:

Հայկին երկնքում դասող մեր նախնիների պատկերացումները՝ մթնոլորտի շերտերի եռահարկ, յոթնահարկ կամ իննահարկ կառուցվածքի մասին⁵⁴ իրենց հիմքով նախնական են⁵⁵ և հանդիպում են ոչ միայն հայկական ավանդություններում⁵⁶, այլև հրաշապատում հեքիաթներում: Ըստ Ավետիք Ամդեցու՝ Հայկ համաստեղության աստղերի պարի մեջ է մտնում Քերքեզը⁵⁷: Չարսանձագից գրառված «Կրակոտ Ոսպ»⁵⁸ հեքիաթում «քանի հազար տարեկան Չեչել - քերքեզ»⁵⁹ թռչունը գլխատված հերոսին կենդանացնելու նպատակով կարողանում է բարձրանալ մինչև երկնքի չորրորդ հարկը: Արևը վառում է նրա գլուխը. «Իննը խաթ է երկինքը, էլավ մեկ խաթը, արևին մոտեցավ. արևը անցնելուն քիմի գլուխը էարավ. գլուխը կոխեց գինու մեջ, բարսըցավ արևի վրա, իրեք սահաթ արևեն բարսըցավ, ընկավ սառոցը, ցուրտ տեղը, շատ զարմանալի ցուրտ է: Իրեք դասը անցավ. դեռոտյունձի (չորրորդ) դասը կայնավ: Աստված հրեշտակը ճանփեց. էկավ տեսավ Չեչել - քերքեզին գլուխը էարած է»⁶⁰:

Մեկ այլ՝ «Կրակոտ Ոսպ»⁶¹ հեքիաթում տիեզերական եռամիասնությունը (Երկինք, Երկիր, Ստորերկրայք) անհատակ ծով է պատկերացվում, որը «ներքուստ թեպետ հակադիր, բայց իրականում մեկ ամբողջություն է կազմում»⁶². «Կրակոտ Ոսպի տունը ծովու մեջտեղն է, տասվերկու դաթ է, մերմեր քարով. քրեճ խորասանով շինած է, երդիկ ու դուռ չկա, մի փենձերե կա, ուր տի էրթս»⁶³: Ընդ որում՝ Երկինքը ևս հաճախ ըմբռնվում է իբրև ծով, որը քառասյին ջրերի տարերքի մաս կազմելով, «սահմանափակում է տիեզերքը բոլոր կողմերից... և այդ իմաստով այն համարժեք է ստորին աշխարհին»⁶⁴: Եվ քանի որ Ստորերկրայքը, հայոց պատկերացումներում նույնական է քառսին, ուս-

⁵⁴ Արդի գիտությունը օդային օվկիանոսը բաժանում է հինգ կառուցվածքային շերտերի (Հայկական սովետական հանրագիտարան. հ. 7, Երևան, 1981, էջ 517 - 518):

⁵⁵ Мифы народов мира, т. 1, М., 1980, с. 233.

⁵⁶ Գ. Ա. Ն ժ դ ե հ յ ա ն. Պատմաբանություն. - «Ազգագրական հանդես» (այսուհետև՝ ԱՀ), IX գիրք, Թիֆլիս, 1902, էջ 262, ԱՀ, Ա, Շուշի, 1895, էջ 320 - 348:

⁵⁷ Ղ. Ա լ ի շ ա ն. նշվ. աշխ., էջ 130: «Քերքեզը մի աստղի անուն է Հայկ համաստեղությունում» [Հ. ր. Ա ճ ա ռ յ ա ն. Հայերեն արմատական բառարան (այսուհետև՝ ՀԱԲ), հ. IV, Երևան, 1979, էջ 574]:

⁵⁸ ԷԱԺ, հ. Բ, էջ 216-228:

⁵⁹ Քարքազ (Քերքեզ) - անգղի արաբերեն անունն է (Ղ. Ա լ ի շ ա ն. նշվ. աշխ., էջ 166, ՀՃՀ, հ. X, էջ 510):

⁶⁰ ԷԱԺ, հ. Բ, էջ 226: Ամենայն հավանականությամբ, հայոց պատկերացումներում «Չեչել - քերքեզ» թռչունը հենց ագռավն է՝ իբրև հրապաշտական շրջանի խորհրդանիշ, երկնային կամքի պատգամաբեր, արևի սուրհանդակ (այդ մասին մանրամասն տես Վ. Մ ե լ ի ք - Օ հ ա ն ջ ա ն յ ա ն. Միթրա - Միերի արբանյակներն ու գործակալները. - Գրական-բանասիրական աշխատություններ, գիրք Ա, Երևան, 1946, էջ 270): Բացի այդ, մեր շարադրանքում վկայակոչված գոտի - օրացույցի վրա ագռավը փորագրված է անմիջապես արեգակի կողքին (Բ. Թ ու մ ա ն յ ա ն, Հ, Մ ն ա ց ա կ ա ն յ ա ն. նշվ. աշխ., էջ 30): Անձնագրի ագռավի փոխակերպումը չար ու մութ ուժերի՝ հին ու նոր կրոնների բախումն է, առավել ուշ ժամանակաշրջանի քրիստոնեական գաղափարախոսության արդյունք (Ա. Ղ ա ր ի յ ա ն. Ագռավի պաշտամունքի հետքերը հայ ժողովրդական ավանդություններում. - Հայոց սրբերը և սրբավայրերը, Երևան, 2001, էջ 134-138):

⁶¹ ԷԱԺ, հ. Բ, էջ 216-228:

⁶² Մ. Հ ա ր ն ի թ յ ն ի ն յ ա ն. նշվ. աշխ., էջ 16:

⁶³ ԷԱԺ, հ. Բ, էջ 224:

⁶⁴ В. Н. Т о п о р о в. Об отражении одного индоевропейского мифа в древнеармянской традиции. - ИФЖ, 1977, № 3, с. 102.

տի այն կարելի է տարանջատել Տիեզերքի՝ իբրև Քառսին հակադիր ստեղծված միասնության եռամասն կառույցից⁶⁵. «Գնրց հասավ ծովուն քնարը, զարկեց ձինը ծովը, գնրց հասավ սարայր. չորս դին օլրտավ դուռ չկա, էրդիկ չկա, տարվեր հայավ, մի փենձերե կա. տեսավ օ աղջիկը վերի դաթը մի ճնճղա պար կերևա, տղան պոռաց, – Բռնածդ ինչ է, պարան կապե էջիր: Աղջիկը պարան կապեց, էջավ, տղան հանեց ծովուն քնարը»⁶⁶:

«Արտուճ և խաղաղ թագավոր» (Չարսանճագ) բանաձևային հեքիաթի հիմքում հաստատապես ընկած են Հայկական լեռնաշխարհի տեղաբնիկների տոմարական և աստղաբաշխական գիտելիքները, որտեղ Արևն ու Լուսինը սոսկ բնական տեսարանների վերարտադրություններ չեն, այլ գաղափարների ու գիտելիքների հետ կապված մոտիվներ: Հեքիաթի՝ փորձությունների փուլում հայտնված հերոսին թագավորը սթափության է կոչում.

– « Այ տղա. մեղք ես, աղջինը գլոխդ կը զինե:

- Ես պատասխանը կուտամ, – ըսրց տղան»⁶⁷:

Փորձությունը հաղթահարվում է հարց ու պատասխանի մակարդակում. «Աղջիկը ու տղան նստան օդի մեջ, աղջիկը հարցոց.

- Տղա, ըն ի՞նչ կենդանի է՝ էռսուն օր կապրի, մե օր կը մեռնի, մեկեալ օր կը սաղնա:

- Էան լուսնիակն է՞⁶⁸:

- Ըն ինչ մարդ է, իրեք ամիս սուգ է, նե կքնանա, նե կը պարկի, մարդու չերևար:

- Էնի արևն է՞⁶⁹:

Թեև Լուսինը նվագ է, քան Արևը, «բայց նրա պաշտամունքը գուցե ավելի հին է ու քաղդեությանը ժամանակակից: Կա Ս. գրքի մեկնիչների կարծիքը, որ մեր ազգի կամ երկրի անունը ըստ օտարների՝ Ար - մենի կամ Ար - միննի, եբրայերեն նշանակում է «լուսնի լեռ», կարծես լեռան վրա՝ հիշատակված դրացի քաղդեացիների նման լուսնի դիտորդներ են եղել»⁷⁰: Այստեղ կարևորն այն չէ, թե որքանով է ճիշտ ստուգաբանված արմեն բառը, այլ այն, որ հայերը Լուսինը դիտելիս են եղել լեռներից: Այսինքն՝ հարևան հնագույն ժողովուրդների պես նշանակվել է հատուկ հերթապահություն՝ նորալուսնի նեղ մանգաղի երևալը ազդարարելու համար (եթե Լուսնի եղջյուրները արևելք են նայում, ապա նոր Լուսին է, իսկ եթե ուղղված են դեպի արևմուտք՝ հին Լուսին է)⁷¹:

⁶⁵ Ս. Հ ա թ ու թ յ ու ն յ ա ն. նշվ. աշխ., էջ 17:

⁶⁶ ԷԱԺ, հ. Բ, էջ 224:

⁶⁷ Նույն տեղում, էջ 238:

⁶⁸ Նույն տեղում: Լուսնի փուլերը նույն հերթականությամբ կրկնվում են մոտավորապես 29,5 օրը մեկ անգամ (Հ. Ս. Բ ա դ ա լ յ ա ն. Օրացույցի պատմություն, Երևան, 1970, էջ 12):

⁶⁹ ԷԱԺ, հ. Բ, էջ 238:

⁷⁰ Ղ. Ա լ ի շ ա ն. նշվ. աշխ., էջ 100:

⁷¹ Բ. Ե. Թ ո ո մ ն յ ա ն. Հայ աստղագիտության պատմությունից, էջ 15: Տեղին է նշել, որ Սիսիանից մոտ 3 կմ հյուսիս - արևմուտք, եռանկյունաձև հարթության վրա տեղադրված «Զորաքարերից» 57-ի վերին ծայրում շաղափված են 6 - 8 սմ տրամագծով անցքեր (57 թիվը գրեթե ճշտորեն համընկնում է երկու լուսնային ամիսների օրերի քանակին. մեկ լուսնային ամսվա տևողությունը հավասար է 29 օր 12 ժ. 44 րոպ. 3 վրկ.): Այնպիսի տպավորություն է ստեղծվում, որ այդ անցքերը նախատեսվել են տարբեր ժամանակներում, տարբեր բարձրություններից, որոշակի կետերից երկնային լուսատուների շարժմանը և

«Արտուճ և խաղաղ թագավոր» հեքիաթում հերոսը Երկրի ու աստղերի շարժումները պատկերավոր հիմնավորում է Երկրի պտույտի օրինաչափությամբ.

«Էրկինքն էա լ ժած կուգա:

– Էանանկ ժած կուգա օ աստղերը կը խաղա, ժամանակ կըլլի էրկինքը ջաղցի քարի պես կը դառնա»⁷²:

«Ճուկո և Ճեյրան»⁷³, «Արտուճ և խաղաղ թագավոր», «Ուսկե խու;նձու;րու;ն նաղլը»⁷⁴ (Մեղրի), «Անմահական խնձոր»⁷⁵ (Այրարատ) և այլ հեքիաթներում տոտեմիզմի, տոհմային միավորների ու հասարակական այլ կարևոր պատկերացումների հետ առկա են նաև տոմարագիտական ու աստղագուշակական հաշիվների հետքեր՝ կապված Կենաց ծառի, բուսականության աշխարհի չորս տարրերի հետ: Եթե «Քաչլիկի հեքիաթում»⁷⁶ հողեղեն տղային սատարում են հուր, ջուր, օդ խորհրդանշող օգնական ձիերը՝ «Էն սպիտակ ձին՝ ծով է, էն կարմիր՝ հրեղեն, ես՝ քամեղեն»⁷⁷, ապա «Որսորդ Հայրապետ» հեքիաթում համանուն հերոսն անիրագործելի թվացող հանձնարարությունները կատարում է մոր և «Կանի կուսույա» լեռան վրա ապրող 40 քեռիների մոտ գտնվող «աստղաբաց թղթի» օգնությամբ. «Որդի՛, շատ դժար տավա է, առ սը գիրքը, հայիր գրքի վրայ, գնը՝ էաս գիրքը օ չտանիս, չես կրնը էրթը»⁷⁸:

«Ճուկո և Ճեյրան» հեքիաթում երեք գուշակ դև քույրեր «ոսալ են նետում» և նշանակի միջոցով գուշակում են «տասվերկու տարի ավ ու դուշ անող արբուն հողուն մեջ» ընկած տղայի՝ Մախպութի ճակատագիրը. «Բերին էրկըթե լուծ մի տնկեցին, գետինը փորեցին, գարկեցին, էրկըթե սամի մ՛էալ անցուցին զլոխը:– Տեսեք էաս լուծը նշանակ է. էկըր ինք իրան կորգուսվ գետինը՝ տղան մեռած է. էկըր սամին կոյրված է՝ տղան նեղութեան մեջն է, ժմնեցեք, հանեք»⁷⁹:

Մարդու բնության հետ ունեցած աստեղային համադրությունը առարկայացել է ոչ միայն վերոհիշյալ հեքիաթի դիպաշարում, այլև միջնադարյան որոշ ձեռագրերում⁸⁰: Այդպիսին է, օրինակ, ձեռագրերից մեկը⁸¹ կենտրոնում պատկերված մարդը (գուշակո-

դիրքին հետևելու համար, այսինքն յուրատեսակ աստղադիտարան են եղել: Մեծամորի փոքր բլուրը ևս ունեցել է պաշտամունքային - աստղագիտական նշանակություն: Վերջինիս կապակցությամբ Ջ. Ս. Հոուկինսը ակադեմիկոս Վ. Հ. Համբարձումյանին ուղղված նամակում գրում է. «Ես համոզված եմ, որ Ստոունհենջը միակը չէ, և պետք է սպասել այդպիսի աստղագիտական մշակույթ Հայաստանում» (Է. Խ ա ն զ ա դ յ ա ն, Կ. Մ կ ր տ չ յ ա ն, Է. Պ ա ր ս ա մ յ ա ն. նշվ. աշխ., էջ 144, 149, Օ. Ս. Խ ն կ ի կ յ ա ն, Միսիանի գորաքարերը. – «Հայաստանի բնություն», 1984, № 4, էջ 33–34):

⁷² ԷԱԺ, հ. Բ, էջ 240:

⁷³ Նույն տեղում, էջ 151–163:

⁷⁴ ՀԺՀ, հ. VII, Երևան, 1979, էջ 585–597:

⁷⁵ ՀԺՀ, հ. II, էջ 23–38:

⁷⁶ ՀԺՀ, հ. X, էջ 107–116:

⁷⁷ Նույն տեղում, էջ 108:

⁷⁸ Նույն տեղում, էջ 260–261:

⁷⁹ Նույն տեղում, էջ 156:

⁸⁰ ՄՄ, ձեռ. № 9422, -1973, -8973, թ. 33բ:

⁸¹ № 8973, 32բ:

ղը)⁸², որի մարմնի տարբեր մասերը (գլխից մինչև ոտնաթաթեր)⁸³ գծերով միացած են տարբեր կենդանակերպերի հետ, որովհետև հնագույն պատկերացումների համաձայն՝ «երկոտասան աստեղատանգը» իշխում և տիրում են մարդկանց տասներկու անդամների վրա. «Եւ ամենայն բարուց և բնութեանց կամաց և գործոց՝ բարեաց և չարեաց՝ որ ինչ միանգամ ի մեզ իրք կրին, զաստեղոգ դնեն պատճառ»⁸⁴: Հետևաբար, տվյալ կենդանակերպի տանտուտերության շրջանում աստղաբաշխական հաշիվները մարդկանց կարող են պաշտպանել մարմնի համապատասխան մասերի վնասվելուց, հիվանդություններից ու չար ուժերի ազդեցությունից, ինչն էլ փորձում են անել «Ճուկո և Ճէյրան» հեքիաթի «ոսմ նետող» գուշակները: Հեքիաթի տղան՝ Մախպութը, սրտից է վիրավորվել: Բուժելու համար անհրաժեշտ է՝ «Սրտեն էարին առնել»⁸⁵, իսկ Ղ. Ալիշանի վկայությամբ՝ «Հայկի աստղատան ներքո ծնվածը երկայթից է մեռնում»⁸⁶: Այրարատից գրառված հեքիաթներից մեկում «Աստղ ջոկողը տեհավ, որ երկնքում իրա ընկերների մի աստղը կորել ա, իմացավ, որ նրան մի բան ա պատահել»⁸⁷:

Ակներև է, որ հայ ժողովրդական հեքիաթների հերոսները նկատել են ինչպես Արեգակի, Լուսնի տեսանելի շարժումները, այնպես էլ աստղերի խմբավորումները (Կենդանաշրջանի համաստեղությունները): Աստղերի ճնշող մեծամասնությունը երկնաշրջանի վրա պատվում էր արևելքից արևմուտք, որոշ «աստղեր» էլ մերթ կանգ էին առնում, շարժվում հակառակ ուղղությամբ, գծում արտասովոր օղակներ: Թվում էր՝ նրանք մոլորվել են իրենց ճանապարհից: Այստեղից էլ՝ անգեն աչքով դիտվող այդ «աստղերի» մոլորակ անվանումը: Դրանք թվով յոթն էին՝ Մերկուրի (Փայլածու), Վեներա (Արուսյակ), Մարս (Հրատ), Յուպիտեր (Լուսնթագ)⁸⁸, Սատուրն (Երևակ), Արեգակ, Լուսին:

⁸² Որոշ ձեռագրերում գուշակողին փոխարինում է Լուսինը, Արևը կամ Քրիստոսը (ՄՄ, ձեռ. 9422, 451 և 509 էջերի գլխագարդերը):

⁸³ Ըստ որում, Խոյը ղեկավարում է գլուխը, Յուլը՝ վիզը, Երկվորյակները՝ ձեռքերը, Խեցգետինը՝ թիկունքը, Առյուծը՝ սիրտը, Կույսը՝ որովայնը, Կշեռքը՝ պորտը, Կարիճը՝ սեռական անդամը, Աղեղնավորը՝ ազդրերը, Այծեղջյուրը՝ ծնկները, Ջրհոսը՝ սրունքները, Չկն էրը՝ թաթերը (ՄՄ, ձեռ. № 1973): Միջնադարյան որոշ ձեռագրերում այս համապատասխանությունները մասամբ փոփոխված են:

⁸⁴ Ա ն ա ն ի ա Շ ի ր ա կ ա ց ի. նշվ. աշխ., էջ 20:

⁸⁵ ԷԱԺ, հ. Բ, էջ 160:

⁸⁶ Ղ. Ա լ ի շ ա ն. նշվ. աշխ., էջ 238:

⁸⁷ ՀԺՀ, հ. III, Երևան, 1962, էջ 423:

⁸⁸ 1894 թ. ս. Ղազարի վանքի հայկական աստղադիտարանում (հիմնադրվել է XIX դ. 40-ական թվականներին) աշխատելիս Վենետիկի Մխիթարյան միաբանության գիտնական Խորեն Մինանյանը աշխարհում առաջին անգամ հայտնաբերում է Լուսնթագի (Յուպիտեր) վեցերորդ արբանյակը: Այդ մասին նա մանրամասն տեղեկացնում է Վատիկանի դիտարանի տնօրեն Հ. Տենցային: Տնօրենը գյուտը մերժում է տարօրինակ պատճառաբանությամբ, ըստ որի՝ Լուսնթագի վեցերորդ արբանյակի առկայությունը անկայունություն կմտցներ մոլորակների դրության մեջ: Ուղիղ տասը տարի անց Լուսնթագի վեցերորդ արբանյակը նորից է «հայտնաբերվում», այս անգամ ամերիկացի աստղագետ Պերայնի կողմից: Այժմ դիտվում են Լուսնթագի ոչ թե 6, այլ 12 արբանյակներ, և համակարգությունը միանգամայն կայուն վիճակում է: Ֆրանսիացի մեծ աստղագետ Կ. Ֆլամարիոնը այցելել է ս. Ղազար վանքի հայկական աստղադիտարան, հետաքրքրվել նրա գործունեությամբ և այցելուների գրքում թողնելով իր տպավորությունները՝ ստորագրել «Гражданин неба. К. Фламарьон» [Ե. Բ. Թ ու մ ա ն յ ա ն. Հայ աստղագիտության պատմությունից, էջ 140–141, 218–219, 264, Հայկական սովետական հանրագիտարան, Սովետական Հայաստան (լրացուցիչ), էջ 380]:

«Երգյինքաժն վեր ընգաժծ խանչալը»⁸⁹ (Արցախ), «Շեր խաս»⁹⁰ (Վան-Վասպուրական), «Շահգադե»⁹¹ (Տուրուբերան - Մուշ), «Զվալ աստղ և նռան հատ ու Օսկեժամ»⁹² (Բաղեշ), «Կուր թագավորի տղեն»⁹³ (Գուգարք-Լոռի) և այլ հեքիաթներում աստղաբաշխ հերոսներն օժտված են մարդկանց ու համաստեղությունները համապատասխանեցնելու տիեզերական գործառույթով. «Աստղաբաշխը գնում ա դուս ու թեզ տուն գալի.- Տղերք,- ասում ա,- էն աղջկա աստղը էն ա հա խվարում ա»⁹⁴ կամ «Մին ուրոճագոճուն ասթխագետ ախպերը ըրաժգոճուը տեսնում ա, վեր ախպորը ասթխը ծլլաց, վեր ընգավ»⁹⁵:

Որոշ հեքիաթներում⁹⁶ «ռամչի ախպերը» երագի կամ մատանու խավարած ակի միջոցով է գուշակում, որ «ախպոր հալ նեղ է». «Թե իմ մատանըքի ակը խավարի, կիմանամ, որ ախպերտինքս նեղ տեղն էն ընկե, կգամ կհասնեմ»⁹⁷ (մատանու շաղափին տվող ակը հմմտ. ցուլացող աստղերի հետ):

«Նռանհատի հեքիաթում»⁹⁸ նույնանուն հերոսը քեռու հետ հյուրընկալվում է ծայրամասում ապրող մի մարդու մոտ, որը հեռադիտակով հետևում է աստղերին. «Կը տեսնան օր տանտեր դուրբին մե դրեր է վրը աչքերուն, աստղեր կիշկե:

Նռանհատ կը հարցու.

- Հորոխպեր, էդ ի նչ է հմալ կիշկիս:

- Ես աստղաբախշ իմ, աստղեր կիշկիմ, տեսնամ ո՛ր կը մեռնի, ո՛ր կապրի, ո՛ր տղայան աղջիկ ո՛ր մե աստղի տակ կը ծնի, ո՛ր իղբլով (բախտ) կեղնի, ո՛ր անիղբալ, ո՛ր - գանգին կեղնի, ո՛ր աղբատ»⁹⁹:

Աստղերի հետ ունեցած առնչությունների հիշողություն պիտի համարել «Սասնա ծռեր» դրուցազնավեպի հերոսներից մեկի՝ Աստղ Ցոլածնի (Պարոն Աստղիկ) կերպարը, ով իր անվամբ և օդում հանդես գալու գործառույթով «հրմեն երկնուց աստղերուց կը խասկնար, ինչ որ ընցներ, դառներ»¹⁰⁰:

Մեկ այլ պատումի համաձայն՝ Վերգոն աստղաբաշխ - գուշակ էր. «Ցռան Վերգո աստղապաշտ էր, աստղեր կը ճանչներ, ըմեն մարթու աստղը»¹⁰¹: Երագների միջոցով

⁸⁹ ՀԺՀ, հ. V, էջ 554-558:

⁹⁰ ՀԺՀ, հ. XV, էջ 284-289:

⁹¹ ՀԺՀ, հ. XIII, էջ 91-101:

⁹² ՀԺՀ, հ. IX, էջ 361-375:

⁹³ ՀԺՀ, հ. VIII, էջ 561-571:

⁹⁴ ՀԺՀ, հ. VIII, էջ 569:

⁹⁵ ՀԺՀ, հ. V, էջ 557, հ. XV, էջ 284:

⁹⁶ ՀԺՀ, հ. VIII, էջ 175, ՀԺՀ, հ. XIII, էջ 99:

⁹⁷ ՀԺՀ, հ. I, էջ 151:

⁹⁸ ՀԺՀ, հ. X, էջ 83-88:

⁹⁹ Նույն տեղում, էջ 86: Աստղեր դիտելու «դուրբինը» հմմտ. Մատենադարանի № 1770 (1589 թ. գրչություն) ձեռագրի 381ր և 382ա թերթերի՝ մարդու մարմնի մասերի և Կենդանակերպերի համապատասխանության նկարներում պատկերված, ինչպես նաև № 1780 ձեռագրի 313 թերթում նկարագրված աստղաբաշխական գործիքի հետ:

¹⁰⁰ Սասնա ծռեր. հ. Բ, մաս 1, Երևան, 1951, էջ 421:

¹⁰¹ Նույն տեղում, էջ 541:

արտահայտվող աստղահամայնությունը «Մասնա ծոերում», Ս. Հարությունյանի դիտարկմամբ, խորհրդանշում է յուրային և օտար էթնիկական միավորներ (Մասուն/Մարր), որոնք հակադրված են միմյանց իրենց պայծառության աստիճանով (լուսավոր/խավար)¹⁰²: Ահավասիկ Մարամեյիքի մոր երազը կովից առաջ.

... Ես կես գիշերին երազ մ'տեսա՝
Մարա աստղն մութն խավար էր,
Մասնա աստղն լույսն պայծառ էր¹⁰³:

Մեկ այլ պատումում տոհմական հատուկ աստղը Դավթի անվան միջոցով ավելի որոշակիորեն է կապվում մեր նախնիների պաշտամունքի հետ.

Ձենով Հովան գիշերվա ժամանակ դուս էլավ.
Ըրըշկից՝ Դավթի աստղը մժղավիր իր.
Էկավ տուն, ասաց. – Կնի կ,
Ճրագ էրա, Դավիթ նեղ տիդն ի¹⁰⁴:

Հայ մատենագրության մեջ զգալի տեղ գրավող աստղաբաշխական տվյալների համաձայն՝ թագավորական պալատներում աստղագուշակները մեծ հարգանք էին վայելում՝ կանխատեսելով սպասվելիք պատերազմները, դրանց ելքը, համաճարակները, սովը, պետությունների բախտը: Ըստ Եզնիկի՝ նայած թե որ կենդանին էր աստեղատան իշխողը, ըստ այդմ էլ որոշվում էր ծնվողի ապագան¹⁰⁵:

«Խեր էղնի»¹⁰⁶ (Տուրուբերան - Մուշ) հեքիաթում Արևմտյան թագավորը Արևելյան թագավորին լուր է ուղարկում, թե՛ «Յամ մարդը կճամբե հ'իգա ընծիկ, աշխրքի հ'որթալախ ցուցու ու ասե հ'երկինք քա՛նի աստղ կա, աստված ի՛նչ կէնե յամ՝ կէլնիմ հ'իգամ ուր վրեն կռիվ»¹⁰⁷:

Հայ առասպելաբանական հավատալիքների համաձայն՝ «ամեն մարդ աշխարհ է գալիս մի աստղի տակ», իսկ աստղերն «իբրև ջահեր առանց պարանի կախված են բարձր ու լայն, անսյուն ու անգերան կառուցված երկնային տաճարում և առանց ձեթի լույս են տալիս: Դրանց մի մասը բարի է, մյուսը՝ չար»¹⁰⁸: Աստղերը նույնպես սիրո կարիք ունեն, ինչը դրսևորվում է հասկապես Համբարձման տոնի չորեքշաբթի լույս հինգշաբթի գիշերը: Բախտավոր է այն մարդը, ով բարի աստղի տակ է ծնվում (ասել է թե՛ աստղով է), անբախտ է՝ չար աստղի տակ ծնվողը¹⁰⁹ (աստղը թեքված է):

«Դերձիկի ախչիկ»¹¹⁰ (Այրարատ) հեքիաթում աստղաբաշխ աղջիկը գուշակում է, որ տղայի մահը տասն օրվա ընթացքում է գալու, իսկ «Սոյլամազ խանրմի հեքիաթում»¹¹¹

¹⁰² Ս. Հ ա Ր Ն Ի թ յ Ն Ի յ ա ն. նշվ. աշխ., էջ 76:

¹⁰³ Մասնա ծոեր. հ. Ա, Երևան, 1936, էջ 1055:

¹⁰⁴ Նույն տեղում, էջ 365:

¹⁰⁵ Եզնիկայ Կողբացոյ Բագրեւանդայ եպիսկոպոսի Եղծ աղանդոց, Վենետիկ, 1826, ԺԴ, ԺԵ, էջ 155–163:

¹⁰⁶ ՀԺՀ, հ. XII, Երևան, 1984, էջ 544–547:

¹⁰⁷ Նույն տեղում, էջ 545:

¹⁰⁸ Գ. Շ ե Ր Է ն ց. Վանա սագ, մաս I, Թիֆլիս, 1885, էջ 142:

¹⁰⁹ Ս. Ա Ր Է ղ յ ա ն. նշվ. աշխ., էջ 47:

¹¹⁰ ՀԺՀ, հ. III, էջ 165–169:

¹¹¹ ՀԺՀ, հ. I, էջ 382:

պարզելու համար՝ աղջիկը կենդանի է, թե՞ մեռած, «հիրիկվա աստղը ճառագայթելու ժամանակ» աստղապաշտ տղան նայում է երկնքին:

«Խըսսիլ չուգուօղ մուօրդը»¹¹² (Քեսապ) հեքիաթում Գաբրիել հրեշտակը ծերունուն տանում է վերև և բացատրում, որ երկնքի անհամար աստղերը մարդ էակներ են.

« – Խաչեղբայր, – կը հարցնե ծերուկը, – ես ասոնց մեջ կա՞մ:

– Անշուշտ կա:

– Ես ո՞ր մեկն եմ:

– Ահավասիկ, ատիկա դուն ես:

Ծերուկը կը նայի, որ ճրագին ձեթը շատ պակասած է:

– Խաչեղբա՛յր, – կը սե ծերուկը, – կաթիլ մը ձեթ դիր ճրագիս:

– Չէ՛, – կը սե Գաբրիել հրեշտակը, – ատոր կրկին ձեթ չի դրվիր: Ահա, այդ ձեթը որ վերջանա՞ դուն ալ կը վերջանաս»¹¹³:

Մարդու՝ բնության հետ ունեցած կապի այս առասպելաբանական անդրադարձման մասին է վկայում ժողովրդական այն հավատալիքը, ըստ որի՝ «յուրաքանչյուր մարդ մեռնելիս երկնքից ցուլալով վայր է ընկնում նաև նրա աստղը (ցուլացող մետեորիտներ)»¹¹⁴:

Հայկական լեռնաշխարհի նախաբնականներին պատկանող տոմարական ու աստղագիտական բնույթի գոտիները, լուսատուների պատկերներով զարդարված տնային օգտագործման առարկաները, աստղաբաշխական բնույթի ժայռապատկերները¹¹⁵ (Մեծամորի բարձունքում, Սևանի շրջապատում, Վարդենիսի լեռներում), մ. թ. ա. I հազարամյակի կեսերից կատարելագործված լուսնային, ապա՝ արեգակնային օրացույցները¹¹⁶, խավարումների մասին մատենագրական տեղեկությունները¹¹⁷ վկայում են, որ մեզանում ամենավաղ շրջանում աստղալից երկինքն անվանադրվել է ըստ համաստեղությունների:

Ֆրանսիացի հայտնի աստղագետ Կ. Ֆլամարիոնի¹¹⁸, աստղագիտության պատմության լավագույն գիտակ, անգլիացի գիտնական Վ. Օլկոտի¹¹⁹ և այլոց (Ա. Բերրի, Վ. Ռո-

¹¹² Հ. Չ ո Ն Լ ա թ յ ա ն. Քեսապ. հ. Բ, Հալեպ, 1998, էջ 421:

¹¹³ Նույն տեղում, էջ 425:

¹¹⁴ Մ. Հ ա Ր ո Ն Թ յ ո Ն յ ա ն. նշվ. աշխ., էջ 65: «Մետեորները կամ ինչպես ոչ ճիշտ ասում են «վայր ընկնող աստղերը» երկնային քարեր են, որոնք իրենց շարժման ընթացքում հանդիպելով Երկրագնդի մթնոլորտին, նրա հետ շփվելով՝ շիկանում են և այրվում՝ թողնելով լուսավոր հետք» (Բ. Թ ո Ն Լ ա թ յ ա ն. Ծիր կաթին, էջ 10):

¹¹⁵ Հ. Ա. Մ ա Ր տ ի Ր ո Ն յ ա ն, Հ. Ռ. Ի ս Ր ա յ Է Լ յ ա ն. Գեղամա լեռների ժայռապատկերները. – Հայաստանի հնագիտական հուշարձանները, պր. 6, Երևան, 1971, էջ 293:

¹¹⁶ ՄՄ, ձեռ. № 1971, թթ. 84 – 85, 93ա – 95բ, ձեռ. № 1973, թթ. 79 – 84, ձեռ. № 2001, թթ. 162–167:

¹¹⁷ 1284 թ. Հովհ. Երզնկացու՝ Ասլոց իշխանի խնդրանքով գրած չափածո աշխատությունից երևում է, որ հեղինակը տեղյակ է Լուսնի խավարման ժամանակ Արեգակի ու Լուսնի միևնույն Գենդանակերպի նույն մասում գտնվելու մասին. «Ի միևնույն Գենդանակերպ և յաստիճան / Ընդ մէջ անկեալ լուսոյ ծագման արեգակն) Եւ շուք երկրի ի միոջէ կողմանակն / Ի հարաւոյ կամ հիւսիսոյ դիմակնան / Նովար ծածկի լոյսըն լուսնի ծագողական / Եւ մթթագեալ ճառագայթիցն սևանան» (Յոհաննիսի Երզնկացոյ Տետրակ համառոտ և լի իմաստախոհ բանիք. Նախիջուան, 1792, էջ 34):

¹¹⁸ К. Ф л а м а р и о н. История неба. СПб., 1875, с. 152–158, 161:

¹¹⁹ У. Т. О л ь к о т т. Легенды звездного мира. СПб., 1914, с. 8–10.

սովակայա) աշխատություններում բազմաթիվ հիշատակումներ կան Հայկական լեռնաշխարհի ու նրան սահմանակից երկրների բնակիչների աստղաբաշխական գիտելիքների մասին. «Ըստ այլ կարծիքի, որին մինչև այժմ քիչ է ուշադրություն դարձվել, և որը, սակայն, ինձ ավելի հավանական է թվում, առաջին աստղագիտական դիտումներն ու երկնոլորտի առաջին պատկերումը որոնելու համար անհրաժեշտ է բարձրանալ արևելքից (Եգիպտոսից – Թ. Հ.) դեպի միջին լայնությունները»¹²⁰:

Վ. Օլկոտը, հենվելով Մաունդերի ու Սվարցի հնագիտական ուսումնասիրությունների ու ենթադրությունների վրա, եզրակացնում է, որ «աստղաբաշխության տվյալները համապատասխանում են պատմական ու հնագիտական ուսումնասիրություններին այն բանում, որ համաստեղությունների հնագույն ձևերը հորինող մարդիկ, հավանաբար, ապրել են Եփրատի հովտում, ինչպես նաև Արարատ լեռան մոտակա շրջաններում»¹²¹:

Եգիպտական ձեռագրերում գրառումներ կան այն մասին, որ նրանք իրենց աստղագիտական տեղեկությունների զգալի մասը վերցրել են քաղդեացիներից և հետագայում փոխանցել հույներին¹²²: Միանգամայն իրավացի էր հայ մշակույթի հանրագիտակ Դ. Ալիշանը, երբ հայկական ու քաղդեական հեթանոսական կրոնների նույնանման փաստերի գոյությունը հիմնավորելիս գրում էր. «Քաղդէից և հին Հայոց երկիրն՝ գրեթե միջոց չկայ. Կորդուաց լերինքն՝ հիւսիսային կողմէն Հայոց են, հարաւէն՝ Քաղդէից...»¹²³, ինչն էլ վկայում է այդ երկրներում թե՛ տնտեսական և թե՛ մշակութային ընդհանրությունների մասին:

Աստղալից երկնքի ու մեր նախնիների պաշտամունքի հետ կապված հնագույն հավատալիքները, ըստ էության, առնչվում են չար ու բարի ուժերի մասին մարդկանց ունեցած պատկերացումներին: Պատահական չէ, որ տարբեր ձեռագրերում Կենդանակերպերը կարող են հանդես գալ տարբեր ձևերով: Այսպես՝ Աղեղնավորը երբեմն

¹²⁰ К. Ф л а м а р и о н. Նշվ. աշխ., էջ 152: «Ի պատիվ մեծ գիտնականի՝ 1021-րդ աստղակերպը (астероид) անվանադրվել է Ֆլամարիոն» (Ю. А. К а р п е н к о. Названия звездного неба. М., 1981, с. 119):

¹²¹ У. Т. О л ь к о т т. Նշվ. աշխ., էջ 8: «Նկատվել է, որ համաստեղությունները պատկերող ձևերի թվում բացակայում են հետևյալ կենդանիները՝ փիղը, ուղտը, գետաձին, կոկորդիլոսը և վագրը. դրա համար էլ մենք կարող ենք հաստատել, որ ոչ չնդկաստանը, ոչ Արարիան և ոչ էլ Եգիպտոսը չեն կարող լինել այն տեղը, ուր ծնվել է երկնային սֆերայի գաղափարը: Հունաստանը, Բտալիան ու Բսպանիան մենք կարող ենք դուրս հանել այն պատճառաբանությամբ, որ համաստեղությունների թվում գոյություն ունի առյուծի պատկերը: Այսպիսով, հարցին գուտ տրամաբանորեն մոտենալով, մենք կարող ենք հաստատել, որ աստղային պատկերների հայրենիքը կարող էր լինել Փոքր Ասիան և Հայաստանը, այսինքն՝ մի տարածք, որ սահմանագծված է Սև, Միջերկրական, Կասպից և Էգեյան ծովերով» (նույն տեղում, էջ 9):

¹²² Նույն տեղում, էջ 9–10: Որոշ հեղինակներ շփոթել են ուրարտացիներին (խալդեր) հին բաբելացիների (քաղդեացիներ) հետ կամ ուրարտական մշակույթն անջատել են խալդերի մշակույթից, սակայն դա ամենին էլ չի նսեմացնում Փոքր Ասիայի և հատկապես Հայկական լեռնաշխարհի հին բնակիչների դերը աստղագիտության վաղ շրջանի կազմավորման ու զարգացման գործում (Բ. Թ ու մ ա ն յ ա ն. Հայ աստղագիտության պատմությունից, էջ 203: Ուրարտացիներին խալդեր անվանելը ճիշտ չէ: Այն ծագել է խալդ աստծո մասին ուրարտական տեքստերի սկզբնական ձևակերպման ոչ ճիշտ թարգմանության հիման վրա. տե՛ս Большая советская энциклопедия, т. 46, М., 1957, с. 38):

¹²³ Դ. Ա լ ի շ ա ն. Նշվ. աշխ., էջ 83:

պատկերվում է որպես սովորական մարդ՝ նետն ու աղեղը ձեռքին¹²⁴, բայց նրան հաճախ պատկերում են հակոտնյա եղբայրների ձևով¹²⁵: Աստղաբաշխական և տոմարական հաշիվները հուշում են, որ այս պատկերացումների հիմքում ընկած են զարնանա - ամառային և աշնանա - ձմեռային ցիկլերը կամ բնության մահվան ու վերածննդի գաղափարները¹²⁶:

«Կուր թագավորի տղեն» հեքիաթում ծեր թագավորն իր չար կնոջն ու նրա տղային զրկում է ամեն բանից, իսկ հանիրավի հալածված բարի կնոջը մեծարում, որդուն էլ թագավոր նաստեցնում՝ ամուսնացնելով աստղաբաշխի շնորհիվ փրկված բարի աղջկա հետ: Հեքիաթն ավարտվում է չար ու բարի ուժերի մշտական պայքարը խորհրդանշող փիլիսոփայական ընդհանրացումով. «Ինչ էլ կա՞ ըստեղ զարմանալու բան. – Բարին հաղթեց, չարը հաղթվեց: Բայց մի թե՛ աշխարքում միշտ ըթե՛նց ա: Հեքիաթներում – հա՛: Իսկ մարդկանց կյանքի մեջ ո՞վ գիտի... Էրնակ չէր ըլիլ, որ մեր կյանքն էլ հեքիաթի նման լիներ, ուր ամեն հետ բարին հաղթում ա, չարը հաղթվում: Էհ, թող բարին համ ընդեղ ըլի, համ ըստեղ, իսկ չարը կորչի, կորչի անդարդ...»¹²⁷:

Ամփոփելով կարող ենք ասել՝

1. Հայ ժողովրդական հեքիաթներում առկա տոմարական և աստղաբաշխական պատկերացումները պայմանավորված են երկնային մարմինների տեսանելի շարժումների օրինաչափություններով, ժամանակային մեծ ու փոքր բաղադրիչների մոդելավորման և մարդու կենսագործունեության, մասնավորապես երկրագործության վրա դրանց ունեցած ազդեցություններով:

2. Աստղային համակարգությունների և մոլորակների մասին պահպանված բանահյուսական, ազգագրական, հնագիտական, մատենագրական տեղեկությունները և ամենավաղ ժամանակներում երկնոլորտն ըստ Կենդանակերպերի ու աստվածացած նախնիների անվանադրելու պատկերացումները վկայում են մեր ժողովրդի տոմարական ու աստղաբաշխական գիտելիքների պատկառելի հնության մասին:

КАЛЕНДАРНЫЕ И АСТРОНОМИЧЕСКИЕ ПРЕДСТАВЛЕНИЯ В АРМЯНСКИХ НАРОДНЫХ СКАЗКАХ

ТАМАР АЙРАПЕТЯН

Р е з ю м е

Календарные и астрономические представления, имеющиеся в армянских народных сказках, обусловлены закономерностью небесных тел, планет, видимых невооруженным глазом, моделированием календарных

¹²⁴ ՄՄ, ձեռ. № 8973, 32ր թերթի գծանկար:

¹²⁵ ՄՄ, ձեռ. № 3884:

¹²⁶ ՄՄ, ձեռ. № 8973, թ. 11ր:

¹²⁷ Նույն տեղում, էջ 571: Ասացող՝ Աղասի, գրառող՝ Վ. Տաշրագի, 1910 թ.:

элементов (время года, месяц, неделя, день и ночь) и их воздействием на земледельческую деятельность человека. Сравнение сюжетов в армянских народных сказках и сохранившихся фольклорных, этнографических, археологических, летописных данных о планетах и звездной системе свидетельствует о глубокой древности календарных и астрономических представлений армянского народа. Примечательно, что с незапамятных времен армяне делили небо на созвездия и обозначали их именами обожествленных предков (Айк, Ваагн). Исследования К. Фламариона, В. Олькотта, В. Россовской, А. Берри, Г. Алишана и других показывают, что первые астрономические знания, в частности, разделение неба на созвездия и составление звездной карты зародились на территории, большую часть которой занимает Армянское нагорье.

CALENDAR AND ASTRONOMICAL IDEAS IN ARMENIAN FAIRY TALES

TAMAR HAYRAPETYAN

S u m m a r y

Calendar and astronomical ideas existing in Armenian fairy tales are conditioned by appropriateness of revolving celestial bodies, planets visible with the naked eye, modeling calendar elements (season, month, week, day and night) and their influence on agricultural activities of a man. Topics that we are interested in in Armenian fairy tales, and remained folkloric, ethnographical, archaeological, annalistic data about planets and celestial system testify of extreme antiquity of calendar and astronomical ideas of Armenian people. It should be noted that from time immemorial Armenians divided the sky into constellations marking them by the names of idolized ancestors (Hayk, Vahagn). Researches of C. Flammarion, W. Olcott, V. Rasovsky, A. Berry, Gh. Alishan and others show that the first astronomical knowledge, in particular, dividing the sky into constellations and celestial mapping was conceived on the territory, a great part of which takes up Armenian plateau.